

# 發刊詞

程天固

居今日中國而言市政，其措施壁畫，固貴乎治理之得人；而開物成務，尤需於市民之協助。蓋中國市政之發軔，起於現代社會之變遷，舉凡關於政治，經濟及社會各方面之都市問題，千頭萬緒，亟待解決。故必官民合作，上下一心，無閼隔，無掣肘，然後可以煥新猷而臻上理也。唯市民之協助，曷由而致之？曰必自市政公開始；然市政公開之道不一，而刊物之發布尚焉。夫市政之目的，以市民利益為依歸者也。凡一政策之布施，一事業之舉辦，一租稅之賦課，其施之於民，用之於民，取之於民者，悉舉而宣之於民。使之釋其懷疑，蠲其誤會，堅其信仰。則一切市政之進行，不特政舉而民從，抑亦事半而功倍者矣。今日歐美各國之市政，莫不以宣傳為當務之急者，意在斯乎？溯廣州市政之創辦，十稔於茲，年有彙刊，旬有公報，日有日報，政靡大小，事無纖巨，舉刊布而宣示諸市民，使瞭然於行政之措施，而為促進之協助。故其始也，拆城築路，反對之不遺餘力者，寢假而惟恐政府之不舉辦矣；至於現在，則更踴躍而督促政府之進行矣。夫豈市民今昔程度之差，

其進步真有如是之速？毋亦政能公開，有以起市民之信仰而已。天固掌工務有年，凡一工程之興辦，事前必詳訂辦法，布告市民，事後猶刻錄徵信，昭示大公。用是得市民不少之協助，而進行上頗覺措置裕如。觀於去年內港之建築，商方巨款之募集，即其明證也。茲者忝長市府，自慚德薄能鮮，益思開誠布公。爰就昔之市政公報，擴充其內容，增益其篇幅，刊布市政，宣示市民。辟彼造象，為妍為媸，見者立辨。又於事實登載之外，兼以市政學理之探討，俾為經營設計之資助，月成一編，名曰「新廣州」，蓋取與民更始及努力建設之義。并於創刊之始，首將二十年度之市政實施大綱，揭曉市民。度是刊之出也，他日將有本於事實之證明，而發為公正之評議者。曰：某也賢，某也不肖；若者宜興，若者宜革。則聽市民之輿論，藉覘市政之得失，不其懿歟！